

Atrobe a haya mas hende den Samba usando droga

ORANJESTAD(AAN) -- E desaroyo den Samba ta sigui alarmante. Informacion cu DIARIO ta dispone di dje ta muestra cu recientemente a bolbe haci un test y a saca cinco persona cu a haya prueba cu nan a usa droga siendo nan ta den tratamiento di rehabilitacion. Notabel ta cu algun di e personanan aki ta e mesun personanan cu algun dia pasa a worde saca door cu nan a pasa e test di droga positivo. Esaki ta muestra cu directiva di Samba no ta mantene su mes na e reglanan stipula.

Un di e reglanan ta cu si haya un persona cu ta bao di tratamiento ta usa droga, ta sak'e di biaha for di Samba. Normalmente un persona ta keda un periodo di mas o menos 6 siman na Samba caminda e ta haya un tratamiento. Meta di e tratamiento ta pa yuda e persona sali for di e malesa di adiccion na droga. E formula cu ta usa pa yuda esnan cu problema di droga ta cu e persona mester kier pa voluntariamente e haya tratamiento.

Ta logico cu e chens ta grandi cu un persona cu tin basta tempo adicto, facilmente por cay bek den droga. Pero ta p'esey mester tin un control riguroso pa asina percursu pa a lo menos e 6 siman nan cu e persona ta den Samba e por sigui e bon caminda.

DIARIO a publica recientemente cu directiva di Samba, a base di sospecho, a tene un test di droga caminda 10 persona a sali positivo pa esaki. Esey ta nifica cu e 10 personanan aki a viola e regla di Samba esta di usa droga durante nan periodo di tratamiento. Ta mas cu logico cu tur e hendenan aki mester a bay y manera e regla ta stipula, nan no por bin por lo pronto mas y Samba ta tuma otro hende cu nan tin riba lista di espera pa tratamiento.

Informacion cu DIARIO ta dispone di dje ta muestra cu aparentemente directiva di Samba a tuma algun di e personanan cu nan a saca bek. Durante fin di siman mester a bolbe haci test y a bin resulta cu algun di esnan cu a tuma bek a bolbe pasa e test positivo. En total a haya 5 persona cu nan a saca for di Samba.

Ta parce cu e control na Samba no ta adecuado y esaki ta haci cu esnan cu ta bay sigui e tratamiento na dado momento facilmente por sali y ta bay na un establecimiento ey banda mes caminda nan ta

haya nan droga. Normalmente un persona cu voluntariamente ta bay tuma e tratamiento no ta spera esaki pero na dado momento e ta hay'e den un situacion caminda e no por controla su mes mas y door cu no tin un control adecua, e ta sali y busca droga no pa su so sino otronan tambe. Esey ta trece cun'e cu un persona cu berdaderamente kier cura di su adiccion, na dado momento ta bolbe hay'e den e tentacion y hopi biaha ta bolbe cay.

Na Aruba ultimo tempo a bin un desaroyo caminda nos mes ta daña pa nos mes. Tin hopi Arubiano hopi cualifica pa haci e trabao aki pero nan no ta haya e oportunidad. Ta trata aki di personanan cu tabata adicto pisa na droga, kendenan awor a recupera y a sigui cursonan ta dispuesto pa yuda otronan. Ta tipo di personanan asina mester recluta pasobra e personanan aki sa kico un adicto na droga a pasa aden y nan sa ki ora e adicto cu ta siguiendo tratamiento ta bayendo den mal caminda.

Ta di lamenta e desaroyo aki y ta di spera cu lo tuma e medidanan necesario pa rescata e poco recursonan cu Aruba ta dispone di dje pa yuda esnan cu ta sufri di adiccion.

Glenbert Croes na Nelson Oduber:

Nos a elimina loke abo a pone como abuso riba lomba di pueblo

Ta ken ta yoyo?

ORANJESTAD (AAN): Segun Glenbert Croes, cu sumo atencion el a tuma nota di articulo di Nelson Oduber referente reduccion di tarifa di awa y coriente.

Ta tristo pa mira con envidia y jaloezie ta caba cu mente sano di hende. Locual cu Nel Oduber no por caba di acepta ta cu e inhusticia di e handling fee cu su persona como Minister President e tempo aya a tuma riba lomba di nos pueblo, cu awe ta tuma Glenbert Croes pa elimina.

E yiu di Betico cu Nel Oduber a saca for di MEP ta esun cu awe ta corrigiendo tur Nel Oduber su inhusticianan cu el a comete riba custiya y lomba di nos pueblo. Pa colmo den e propio articulo Nel Oduber ta afirma di hamas lo a elimina e handling fee si e tabata Minister. Cu otro palabra Nel Oduber ta contra reduccion di tarifa di awa y coriente. Cu otro palabra: su mocion den parlamento tabata un farce total, un tiramento di santo den



wowo di nos pueblo pues un engaño total. Pero a tuma e corahe y determinacion di Glenbert Croes pa logra algo asina grandi pa nos hendenan di mas necesidad. Ora cu Nel Oduber ta haci mofa y chercha, ta tuma Glenbert Croes pa logra baha prijs di awa y coriente den interes y beneficio di nos pueblo. Pasobra si e tempo aya Nel Oduber no a regala na Coastal e \$ 1,75 handling fee y e planta cu ta produci coriente, awe sigur

sigur awa y coriente ta mas barata. Pues ta añanan di inhusticianan grave cu e Lider di MEP a comete riba lomba di nos pueblo. Esaki Glenbert Croes a mira, y manera cu el a bira Minister el a haci e promesa aki na nos pueblo. Y despues di 5 aña e ta cumpli, por fin e ta logra, y e 5.5 miyon di Florin extra pa aña lo worde debil bek na nos pueblo den mas necesidad, e pensionado, esun cu ta cobra onderstand mediante un reduccion di tarifa di awa y coriente pa por duna na nan e alivio financiero cu nan merece.

"Los perros ladran y la caravana pasa" Cu esaki Glenbert Croes kiermen cu aunke cu Nel Oduber ta critica, ta chercha y haci mofa, e bon intencionnan semper lo supera malicia y ta hustamente pa e motibo aki cu ta Glenbert Croes ta esun cu a logra baha prijs di awa y coriente pa nos digno pueblo y no Nel Oduber.

E TRES SABIONAN!!

